

Nukissiorfiit/sanatitsisut aamma sanaartortitsisut akornanni inatsisinik atuinikkut isumaqatigiinnngissutit illoqarfimmumut nunaqarfimmulluunniit isumaqatigiinnngissuteqarfiusunit pilersorneqartunut agguataarinninnerit naatsorsuutinit peerneqarnissaat, taarsiullugulu nuna tamakkerlugu atuisunut tamanut nammaqatigiinneq atorlugu agguataarneqartarnissaat siunertaralugu akinut aalajangersakkanik aaqqissuussinerup maannakkut atuuttup nutarterneranut atatillugu maleruagassat atuuttut allanngortinnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut
(Ineqarnermut, Attaveqarnermut Angallanermullu Naalakkersuisoq)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Siullermeerneqarnera

Naalakkersuisuniit siunnersuuteqartoq Naja Nathanielsen, aalajangiiffigisassatut siunnersuuteqarnerani qutsavigaarput.

Innaallagissamut, imermut kiassarnermullu akeqartitseriaasissamut nutaamut siunnersuut ilivitsuutillugu suliarineqassappat tulluarnerpaajussasoq Naalakkersuisut isumaqarput. Akeqartitseriaatsini nutaani inuiaqatigiit soqutigisaannut pingaaruteqarluinnartut arlallit eqqarsaatigineqartussaammata, ataatsimoortumik aallaaveqartitsinissaq pingaaruteqarpoq.

Taamaattumik akeqartitseriaatsini nutaani akitigut, inuussutissarsiornikkut inuiaqatigiillu aningaasaqarnerannut sunniutissat nassuiarluarneqarnissaat pingaaruteqarpoq. Inatsisartut taamaalillutik aalajangiisinnaalernissaminnut tunngavissanik ataqatigiinnik paasisutissiiffiulluuartunillu tunngavissaqalissapput.

Akeqartitseriaasissaq nutaaq maannakkut suliffeqarnermi illuatungeriinnut suleqatigiit pingasut oqaloqatigiinneranni ilaatinneqarpoq. Akeqartitseriaasissami ilaasussat pillugit illuatungeriit ammasumik oqaloqatigeereerpata, akeqartitseriaasissamut nutaamut siunnersuut ataatsimoortoq Naalakkersuisut saqqummiutissavaat.

Aalajangiiffigisassatut siunnersuut manna akeqartitseriaasissap nutaap oqallisigineqarnerani pingaaruteqartumik immersueqataavoq. Taamaattumik siunnersuutip akeqartitseriaasissamik nutaamik suliaqarnermik ingerlatitseqqinnerminni ilanngutissallugu Naalakkersuisut piumassuseqarput.

Kisiannili Naalakkersuisut allannguutissatut siunnersuummik siunnersuuteqassapput: ”Nukissiorfiit/sanatitsisut aamma sanaartortitsisut akornanni inatsisinik atuinikkut isumaqatigiinnngissutinut aningaasartuutit illoqarfimmumut nunaqarfimmulluunniit immikkoortortamit isumaqatigiinnngissuteqarfiusumit pilersorneqartumut agguataarinnermut naatsorsuutinit peerneqarnissaat, tamatumunngalu taarsiullugu nuna tamakkerlugu atuisunut tamaginnut nammaqatigiinneq atorlugu agguataarneqartarnissaat naleqquttuunersoq, maannakkut akeqartitseriaatsip atuuttup nutarterneqarneranut atatillugu nalilersuinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Taamaalillunilu siunnersuut manna tunngavissanut allanut peqatigitillugu paasiniaaffigineqarsinnaassaaq.

Taamatut oqaaseqarlunga aalajangiiffigisassatut siunnersuut Inatsisartuni kajumittumik suliarineqartussanngorlugu tunniuppara.